

Perche güsta tschinch «quaismas»?

Il nom da la prosma festa religiosa ha in talian ed in frances ün oter tschep co in rumantsch. Il pled engiadinais *Tschinquaisma*, surmiran e sutsilvan *Tschuntgesmas*, sursilvan *Tschuncheismas* vegn dal latin *QUINQUAGESIMA* chi vögl dir 'il tschinquantavel', dimena il tschinquantavel di davo Pasqua. Il talian *Pentecoste*, il frances *Pentecôte* ed il tudais-ch *Pfingsten* vegnan invezza dal grec *PENTECOSTE* chi vögl dir il listess e chi'd es gnü surtut dal latin sainza gnir müdà.

Quista jada nu vaina dimena dachefar cun üna differenza a l'intern dals idioms sco cun *Anzeinzas/Ascensium*, dimpersè cun üna a l'intern da la Romania. Schi co guard' oura il panorama linguistic plü vast da las linguas neolatinas? Nus chattain listessa derivanza sco pel rumantsch eir in tschertas linguas al nord ed impustüt al vest da la Frantscha, nempe i'l vallon *Senquem* (al süd da la Belgia), ed illas linguas veglias da la Spagna e dal Portugal: il catalan vegl *Sincogesma*, il spagnöl vegl *Cinquesma* ed il portugais vegl *Cinquoesma*. Nus chattain dafatta derivats da quist pled latin illas linguas germanas, per exaimpel i'l flamand *Schinksen* (al nord da la Belgia), in l'ollandais *Sinksen* e perfin in

l'irlandais *Cincigais*. Dimena sulet nun es il rumantsch cun seis tschep latin, ma tuottüna e'l isolà da seis vaschins ils plü daspera. Schi our da che motivs nu s'ha derasà quist pled in möd regular? E perche daja eir in latin duos plets per listessa chosa?

Quist'ultima dumanda ans maina a la ragisch da la situaziun linguistica d'hozindi. Tuottas duos fuormas latinas vegnan nempe dal grec: *PENTECOSTE* es ün simpel impraist chi'd es gnü surtut tal e qual, e *QUINQUAGESIMA* es invezza la traducziun in latin da la significaziun greca 'tschinquantavel'. Il pled grec es il plü vegl, perche la terminologia da las festas e da l'organisaziun da la baselgia cristiana primitiva dal seguond e terz tschientiner es gnüda nan da l'Oriaint.

Dal terz al tschinchavel tschientiner haja dat üna ferma tendenza da latinisar ils plets grecs. Quai ha eir fat cha per exaimpel il latin ecclesiastic *QUADRAGESIMA* (*DIES*), derivà da *QUADRAGINTA* 'quaranta' e chi vögl dir 'il quarantavel (di)', dimena ils quaranta dis da giagün avant Pasqua, s'ha derasà in tuot la Romania sainza gnir concorrenà da seis precursur grec *TESSERAKOSTE*, ed ha dat in engiadi-



Chapella da s. Antoni a Run in Val Sumvitg.

nais *Quaraisma*, grischun central *Curesma*, sursilvan *Cureisma*, talian *Quaresima*, frances *Carême*, catalan *Coresma*, spagnöl *Cuaresma*, portugais *Quaresma* e rumen *Paresimi*. Sül model da QUADRAGESIMA es gnü fat QUINQUAGESIMA, chi nun es però rivà d'apertuot da s-chatschar il pled plü vegl chi's vaiva fingià etabli sco term ecclesiastic. Perquai chattaina la nouva varianta in quellas regiuns chi sun gnüdas cristianisadas pür plü tard.

In plü faiva il Grischun, insembel cun üna part dal nord da la Frantscha, part da la diocesa da Köln e da Mainz, ed as re-

chattaiva uschea ourdvert la zona d'influenza da PENTECOSTE al süd.

In l'«Atlas linguistic da l'Italia e da la Svizra dal süd» (tom 4, carta 779) vezzaina cha ill'Italia centrala e meridiunala daja amo otras fuormas dialectalas chi han per granda part rimplazzà il term ufficial: *Pasqua rosa*, *Pasqua di rose*, *delle rose* (Italia centrala, Puglie), *Pasqua dei fiori* (Calabria, Sicilia, Sardegna).

E sco ultim: a Firenze as discha *Pasqua delle rose* 'Pasqua da las rösas' per 'Tschinquaisma' e *Pasqua dell'ovo* 'Pasqua da l'öv' per 'Pasqua'!